

REGIONAL NEWS BULLETIN

HEADLINES (EVENING)

1. Chief Minister Pu Lalduhoma'n Pediatrics Intensive Care Unit a thawk mek Nurse 36 leh anmahni puitu mi 19 tun September thlaa an hna tawp te chu thawk chhonzawm turin a ti.
2. DP&AR Minister Pu K. Sapdanga'n Mizoram inrelbawlina kawnga Sawrkar fawng pawimawh leh sang chelh tur Mizo an awm tlem chu tanlak thar a pawimawh a ti.
3. Supreme Court chuan Tirumala Tirupati Temple-a Prasadam laddus siamnaa ghee chhia hman chungchang chhui turin Special Investigaion Team (SIT) a din
4. Democratic Republic of Congo-a lawng pilah mi 87 an thi.

<><><>

CM

Chief Minister Pu Lalduhoma'n Pediatrics Intensive Care Unit (PICU) a thawk mek Nurse 36 te leh anmahni puitu mi 19 te, tun September thlaa an hna tawp te chu thawk chhonzawm turin a ti.

Chief Minister hian hemi chungchangah hian Health & Family Welfare Principal Director Dr. Vanlalsawma hrilhin hma la zui turin a ti a, an tel lova ICU tam tak a kal zui theih dawn loh avangin an hna lo thawk chhonzawm turin a tih thu a sawi.

Heng PICU te hi Covid19 hripui len laia Emergency Covid Response Plan 2 atanga district paruka din te an ni.

Wawiin vek khan Chief Minister Pu Lalduhoma chuan a pisa-ah Sawrkar laipuaia Ministry of Agriculture & Farmers Welfare Jt. Secy Pi Yogita Rana kawmin Mission Organic Value Chain Development for North Eastern Region hmalakna a sawipui.

Chief Minister chuan Missions Organic hmalakna chu Hand Holding Policy nena tha taka kal kawp thei a ni a ti a. Tha zawka Mizorama kalpui tura chahin Yogita Rana hian an hmalakna leh hmachhawp hrang hrangchipchiar takin a hrilh a ni.

(DIPR)

<><><>

CYMA

Central YMA Vice President leh Kumpulan Committee Chairman Professor Lalnuntluanga chuan Mizo thalaite suattu leh ram himna ti derthawngtu ruihhlo do kawngah ram puma tanrual a ngai ati.

Prof Lalnuntluanga chuan Akashvani Correspondent zawhna chhangin YMA-in kumpulan atan ram leh hnam humhalh a neihna chu tum 15-na a nih thu sawiin nikum December ni 12 atanga nimin October ni 3 thlenga Kumpulan Committee-ten ruihhlo an man tawh zat chu No 4 hawng 778 bakah tic tac bur 3191 leh chhin sen bur 3409 leh Methamphetamine mum nuai 1 sing 1 sang 2 ani tih sawiin tunlaia lar tharruihnaatana an hman thin khuh damdawi bur sang 6 za thum sawmhnih leh pakua te a ni a ti a, thalaite ah Ganja zuk a hluar chho tan hle tih sawiin Ganja kg 158 leh gram 410 bakah pack 39 an man tawh thu a sawi bawk.

Vice President chuan Kumpulan Committee in ruihna atana hman chi damdawi chi dang mum sing chuang lai an man tawh thu sawiin, ruihhlo an man takte hi cheng Nuai 605 Sing 3 Sang 4 leh sawmkaw man ang vela chhut a ni a ti bawk.

Central YMA Vice President chuan Ruihhlo-in chhungkua, Kohhran, khawtlang leh mimal nun nasa taka a tihbuai mek avangin mi zawng zawng awl bik awm lova Ruihhlo dona kawnga tanrual a ngaih takzet thu a sawi bawk.

<><><>

DP&AR MINISTER

DP&AR Minister Pu K. Sapdanga'n Mizoram inrelbawlna kawnga Sawrkar fawng pawimawh leh sang chelh tur Mizo an awm tlem chu tanlak thar a pawimawh a ti.

He thu hi vawiina Zoram Research Foundation, Mizoram IAS Association leh The Aijal Club-te tangkawp buatsaih, Mizoram tana All India Services Cadre hranpa chungchang zirhona a hmanpui na ah sawiin Pu K. Sapdanga chuan All India Services-ah Mizo inziak tling an tlem zel chu veiawm a tih thu sawiin Mizoram inrelbawlna kawnga sawrkar fawng pawimawh chelh tur Mizo an tlem zel chu a veiawm tih sawiin tan lak a pawimawh hle a ti a, Tun dinhmunah Mizoram in All India Services sanctioned post IAS 32, IPS 19 leh IFS 19 a neih mek thu leh, Sawrkar laipuiin IAS leh IPS 6 ve ve a rawn dah thar thu a sawi a. State Sawrkar hnuai a pumhluma All India Services-te an awm theih nan State bil Cadre neih chu thil pawimawh tak nia a hriat thu sawiin, service hun pumpui State danga insawnkual reng lova hmun khata hman hian hnathawh kawngah rah tha a chhuah thei dawn a, Cadre review-te pawh ngaihtuah tel a pawimawh a ni, a ti bawk.

He hunah hian Mizoram in All India Services Cadre hranpa a neih loh avanga inrelbawlna kawnga harsatna a tawh thinte, cadre hranpa neih thatna leh that lohna nia langte tawnhriat nei tawhte'n chipchiar takin an sawi a. Mizoram puala All India Services Cadre hranpa neih a hun tawh takzet thu leh Cadre Review Committee ngaihpawimawh tel a tul thute tarlan a ni.

Tun dinhmunah Mizoram hian All India Services (Indian Administrative Service, Indian Police Service & Indian Forest Service) Cadre hranpa a nei lova, AGMUT Cadre-ah a awm mek a. AGMUT Cadre hnuai hian Arunachal Pradesh, Goa, Mizoram leh Union Territory-te an awm a ni.

(DESK)

<><><>

STA

Mizoram State Transport Authority chuan tun hnaiah khualzin phur zingah chuan man tisang leh tihsan duh awm mahse, tun dinhmunah khualzin phur lirthei chuan man ennawl tul an ti lo.

STA chuan tun hnaiah kawngpui chhia leh tuialhthei man tihsan chhuanlama, khualzin phur lirthei chuan man tisang an awm ni-a hriat a ni chu tha lo an tih thu an sawi a. Tuna lirthei chuan man hman mek chu kumin March ni 12 atanga hman tan chauh a ni a, thla 7 vel chauh hman a la nih avangin State Transport Authority chuan khualzin phur lirthei chuan man ennawn chu tun dinhmunah tul an tih loh thu an sawi.

STA chuan Lirthei chuan man chu kalphung mumal tak nen, hunbi neiin a ennawn thin an ti a, ennawn a nih dawnin District tina Deputy Commissioner kaihhruaina hnuai an NGO hrang hrang te, a kaihhnawih lirthei pawl leh mipui aiawh, Consumer's Union-te nen rawtna siam tir thin an ni a, chung rawtna an dawn zul zui chuan mipui tana rit lo tur leh lirthei neitute tan pawha na lo turin a man hi bithliah thin a ni tih an sawi.

STA chuan, an hnena khualzin phur chi lirtheiten permit an dilna form-ah Sorkar-in lirthei chuan man a bithliahte zawm turin an intiam sa vek a, permit an lak chhuah dawnah pawh Sorkar thu zawm tura intiamin, an hming an sign leh vek bawk thin tih an sawi a, lirthei neitute chu sorkar rate anga tlan thin turin an hriattir a. Sorkar rate zawm lo emaw, Sorkar duh loh dana hmalate chu an permit cancel thlenga hmalak theih a nih thu leh mipuite pawh sorkar rate bithliah anga lirthei hmang thin turin an chah bawk.

(CORR)

<><><>

SARAS FAIR 2024

Rural Development Minister Prof Lalnilawma'n hnam rilru pu chung a mahni hnam thilsiam ngaihsan inzirtir a pawimawh tih sawiin Mizo thilsiam hlut leh chawisan chu hnam hmasawn nan a pawimawh tih a sawi.

He thu hi vawiina Hnahsin Kut Champhai-a neih mekah Mizoram State Rural Livelihood Mission (MzSRLM) buatsaih Sales of Rural Artisans Society Fair (SARAS) Fair Aui Garden-a a hawnna ah sawiin Minister chuan ramdang thilsiam tha tak tak awm mahse mahni hnam siam hlut sak a pawimawh tih sawiin hnam rilru pu chungin mizo dawr hrang hrang te dawr zel turin kalkhawmte a ngen a, hmasawn ngaihna laiah mipuite thurawn la zel turin Department a inpeih tih a sawi bawk.

Minister chuan SARAS Fair thil tum ber chu Self Help Group-te thil tharchhuah, hralh chhuah leh mipui hmaa pholanna remchan zawn a ni a ti a, mipui hip thei turin a tuamna leh a hming pawh duan a ni

tih sawiin ei leh in phochhuah chu Food Safety and Standards Authority of India hnuai ziah luh vek an ni a ti a, mipuiten hlut sak turin a ngen bawk.

SARAS Fair hi MzSRLM bultumin kum 2015 atang khan neih tan a ni a. Kum tin State Capital leh District Headquarters a neih thin tura ruahman a ni a, SARAS Fair 2024 hi SARAS Fair vawi kua na niin October ni 4 atanga ni 11 chhung neih tur a ni. He hunah hian Mizoram hmun hrang hranga Self Help Group ten Stall 44 ah an thil siam te an pho chhuak a ni.

Self Help Group ah hian tun dinhmunah chhungkaw 81,829 an inziaklut tawh a, SHG-te khaikhawm tur hian Village Organisation 791 leh Cluster Level Federation 84 din a ni tawh bawk.

(DESK)

<><><>

POCSO SENTENCE

Kolasib Fast Track Court chuan hnamdang - Asgat Ali chu mipa naupang kumtlinglo a pawngsual avangin kum 20 chhung Jail tang turin a hrem.

Court thuchhuah tarlan danin he paw khawihna hi nikum July ni 22-a thleng a ni a. Mizoram a cement mistiri hnathawk tura lokal hnamdang Asgat Ali (kum 22) Lakhipur, Cachar District chuan an riahna camp bul hnaia mipa naupang kum 10 mi leh a thianpa thim hlima khawlai leng te chu hmu fuhin pakhat zawk chu a man bet a, mipa naupang thianpa chu hlau va a tlan chhiat lai chuan pakhat zawk a man beh chu a kekawr hlihsakin a pawngsual ta mai a ni.

He thil thleng hi a pain a hriat atanga ni lina July ni 26, 2023 khan Vairengte Police Station-ah FIR a thehlut a, police ten rang takin paw khawihntu chu an man nghal a, A lakah hian kumtlinglo pawngsual thubuai POCSO Act hnuai an ziak lut nghal a. Mipa naupang hi Doctor-in exam nghalin hur sualna hmanga khawih chingpen ngei a ni tih chu hmuhchhuah a ni.

Pawikhawihntu Asgat Ali hian Mizo tawng a thiam lova, Bengali tawng leh Hindi bak thiam a nei lo. A chungchang thu rel a nih chhung zawng hian Kolasib District Jail-ah a awm a, vawiin khan a thubuai chu rel felin Pu R. Vanlalena, Judge, Fast Track Court, Kolasib chuan pawikhawihntu hi kum 20 chhung Jail tang tur leh pawisa cheng sang 5 chawi turin a hrem a, Pawisa chawi tur hi a pe thei lo anih chuan thla thum dang a tan belh a ngai dawn a ni.

(Andrew Vanlalauva PTC Kolasib)

<><><>

SUPREME COURT

Supreme Court chuan Tirumala Tirupati Temple-a Prasadam laddus siamnaa ghee chhia hman chungchang chhui turin Special Investigaion Team (SIT) a din a. Indendent SIT ah hian CBI office pahnih, Andhra Pradesh police officer pahnih leh Food Safety and Standards Authority of India (FSSAI) senior officer pakhat a tel bawk a ni. Supreme Court chuan he thubuai thehluttu hrang hrngte thu a ngaihtlak hnuah SIT din hi a rel a. CBI director-in a vil dawn bawk a ni.

(Newsonair)

<><><>

BOAT CAPSIZE

Democratic Republic of Congo-a lawng pilah mi 87 an thi. Vanduaina hi Lake Kivu ah niin provincial government sawidanin lawng chesualah hian mi 78 chin hriatlohin an la awm a. He lawnga chuang zat tak hi tihchian ala ni lo. Lawng chesual ta hi South Kivu-a Minova khua atanga zin chhuak niin Goma tuipui kam a pan laiin a chesual a. Mita hmutute chuan lawngah hian a dawl zawh aia tam mihring an chuang a. Tuiyah metre 700 a thukah a pil a ni.

(Newsonair)

<><><>

UNION FINANCE MINISTER

Union Finance Minister Nirmala Sitharaman chuan sawrkarin sum hman kawngah fimkhur takin a kal a ti. Vawiiina Kautilya Economic Conclave 2024 New Delhi-a neihah he thu hi sawiin Union Finance Minister chuan fiscal deficit chu Fiscal Year 2024 ah zaa 5.6 atangin 2025 ah chuan zaa 4.9 ah a tlahniam dawn a ti a. Hetinga fiscal discipline zawm tura theihtawp chhuah a ni hian sum leh pai dinhmun a siam tha thei dawn a ti a. Viksit Bharat nei tura hmalak meknaah mi rethei, hmeichhia, thalai leh loneitute chu a hlawkna tel tu tur ber an ni a ti a. Kum 2047 ah chuan Viksit Bharat hian India mai nilo khawvel pum tan thil tha a siam dawn a ni a ti bawk.

(Newsonair)

<><><>